

御製周顛僊人傳
南岳魏夫人傳
李 清 傳
紀夢編年
附續編





新嘉坡大坡大馬路門牌一百零二號
新嘉坡大坡大馬路門牌一百零二號
新嘉坡大坡大馬路門牌一百零二號
新嘉坡大坡大馬路門牌一百零二號
新嘉坡大坡大馬路門牌一百零二號

紀
夢
編
年

附續
編

釋成鷺
撰

中
華
書
局

叢書集成初編

御製周顛僊人傳（及其他三種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘二〇九二毫米三十二分之二

統一書號：一七〇一八·一五一

紀夢編年

清釋成鷲跡刪撰

古之老者八十爲耄。耄者至也。言老之將至無以加也。老僧之老至矣。歸期將至回首八十年間半爲俗人半居僧次。俗固夢境。僧亦夢緣。良由多生習氣未除。是致現世虛名貽累。俗眼旁觀少見多怪。名教之士咸目我爲罪人。末法衆生輒相視爲仇敵。開有二三知己索我于形骸之外。愛其自愛才其不才。無過許以高僧契爲詩友。究竟知我罪我各從影子索形。親卿愛卿未免貴耳賤目。當局者夢幻非真。旁觀者見聞亦假。往往仰天長嘆。宇宙之大得一知己死亦足矣。向卜鹿湖避地。偶因足疾還山。寄食叢席。堅閉山門。休心待盡。頗有自得之樂。重陽後霜氣新寒。雨窗無聊。屈指平生僧俗。後先朝露者去如陌路之塵。飄若秋林之葉。升沈輪轉不可復問矣。予何人斯。孤軍後競。呼吸旦夕。能自保其無常乎。因從夢中說夢。幻外求真。略述四大生緣。五倫假合。自童而壯。由壯而衰。前塵影事。依稀記憶。信筆編年。貽後人耳。未敢爲識者道也。老僧俗名顯愷。字曰趾騰。系出廣東廣州府番禺縣韋涌鄉方氏子。禮先師石洞。離幻覺和尚。得度。法名光鷲。字曰卽山。後從平陽祖派。易光爲成。別字跡刪。志在韜光。刪去形跡。因以爲氏焉。號曰東樵。東樵者羅浮之別名。最初出家。先住羅浮。不忘本也。先府君名國驊。字楚卿。號騎田。舉明季乙酉科鄉薦。先母碧江蘇氏。禮報資曠老和尚。稟受三皈。法名悟乾。禮仁壽純覺和尚。受優婆夷五戒。寒家先世

仕宦。書香不絕。至先曾祖諱瓊字達和。官至湖廣襄陽府參軍。遷光化縣令。卒於官。先府君生於楚中。故字楚卿。騎田者。楚粵名山也。因以爲號。先祖懿生公諱口口。以椽曹早世。先君少孤。食貧。與先從伯正菴公同居省城之東門內。少讀書。有文章名。先母二十于歸。事孀姑孝謹。先君硯耕鋤口於四方。餅無貯粟。糟糠不飽。絕無交謫之言。明崇禎丁丑年三月二十一日亥時。不孝子降生。夢老僧入室而婉。先母嘗爲予言。汝從僧來。當從僧去。夙緣如此。次年戊寅。舍弟臨生。一母乳兩兒。紡績養姑。備奉甘旨。殊不易也。先母每言至此。流涕沾臆。哀哀父母。生我劬勞。不知所以報也。一歲至三歲。襁褓無知。不及記憶。四歲時。甫能行走。便學長跪禮拜。先母自少至老。崇信三寶。晨夕焚修。頂禮觀音大士。兒時見而效之。母拜亦拜。齋素從之。未嘗雜以葷酒。是時先君入學。大有聲譽。交遊國中名士。朝夕歌舞。座閒無擊伎。愀然不樂也。予時爲兒五歲。坐先君膝。每見妓女。呼之爲鬼。先君笑而訊之曰。汝母教汝耶。則諫曰。父以鬼爲樂。祖母之教乎。舉座大笑。一日。梨園觴客。呼侍座側。以童心可移也。場中有肖爲達官榮顯者。問曰。汝悅之乎。俯首不答。俄爲大將登壇者。曰。汝悅之乎。笑而已。後有緇衣賜紫者。曰。悅乎。笑而已。三者一無所取。座客叩其所以。對曰。將相高僧。非不可悅。以其戲而非真也。真則悅之矣。四座大笑。謂此兒識真。異日當爲真人。年僅七歲。膂力過人。舉重負汲。能倍壯夫之任。羣兒弗若之也。俎豆嬉戲。率爲牛耳長。時明祚式微。盜賊蠭起。里巷皆兵。予率羣兒效之。竹馬楮旗。斬木揭竿。學布陣於堂下。已而塵飯塗羹。犒師振旅。羣兒麾退。乃掃地布席。爲老僧跏趺之狀。先君笑而問曰。梨園真乎。兒戲真乎。對曰。昨乃假中之假。今爲假中之真。先

君頷之。謂先母云。治天下。亂天下。教壞天下男女。必此子也。是歲之夏。痢疫流行。予染疾殊劇。日行數十餘次。飲食不能杯勺。百藥無效。世醫束手矣。柴臥牀席間。輾轉兩期月。僅得不死。痢下如故也。先君計無復之。昇以往禱於城北漢壽亭侯。卜筮得吉辭而退。甫下階。失足一跌。廟高數仞。拾級而後登焉。久病歷仆。復得重創。計不可起矣。既歸。久痢瘕瘳。創傷漸次平復。返餘生爲無生。皆神之賜也。時年九歲矣。歲在乙酉。久病初起。請於父母。出就外傳。受詩書家學。先君戲之曰。汝憶兒時弄兵堂下乎。奚事詩書。對曰。不事詩書而弄兵。羣盜耳。先君笑而可之。爲之延師。師西樵李夫子。諱彪。字元之。邑諸生。教授有方。先年從兄蒙章。名殿元。甲午舉人。甲辰進士。受業其門。不期月。貫通文義。知有聖賢之學。後通籍宰江寧。鄉縣二邑。有政聲。皆師之教也。夫子初年。受經於先君門下。延至家塾。予與仲弟臨。字定塵。舉鄉薦。名曰廣。比肩同受章句。予頗有夙慧。耳聞心解。過日成誦。方明之季。學者不尊朱註。童蒙止授正文。予於本文。獨出己見。正以師說。甫一年。四子本經。識得大意。下筆學爲童子科業。頗能書寫胸臆。文義卓然。觀者或疑贋筆。卽席命題而試。頃刻立就。律以制義八股體裁。漠然不顧也。時先君以詩文名世。從之遊者。往往吟咏達旦。子請於師。旁通風雅。粗知聲律。自是矢口能詩。不自知有六朝三唐近體也。一夕臘盡隆寒。先君與客分賦花月風雪四詩。沈吟未就。予與仲弟嬉戲堂下。擾亂詩思。先君叱之使去。予鼓掌笑曰。吟詩樂事。苦吟徒自苦耳。客曰。小子亦能詩乎。卽應聲云。瓶中一枝花。窗外一輪月。花落月歸天。風吹滿地雪。座客皆驚。謂能四題合作。詞約景該。長大當爲作者。味其詞。亦枯禪餘習爾。是年先君讀書於鄰坊之亦院。予朝

夕隨侍。不離左右。一日燕客。俎中有肉。予侍客旁。客勸令食。是日齋期。不及記憶。怡然啖之。先君顧而笑曰。兒破戒矣。聞之大慙。哭而歸。跪大士前。叩首出血。母問所以。乃知誤受肉食之故。勸令懺悔。懺悔已。哭猶不輟。出而哇之。盡吐宿食。啜淡粥三日。然後飯食。仍長齋一月。以補前愆。兒時諦信如此。家人卜吾異日。必爲戒律僧也。又疾惡之嚴。自少成性。嘗侍先君側。聞與客談論。甲申之變。曰。宰相誤國。某相公奸。某相公貪婪。某相公庸鄙。桑鈞失人。是致喪亂。不可救也。予聞而心憤之。是歲賓興。先君舉於鄉。粵俗稱謂。子以父貴。出入呼爲相公。予輒然作色。謂其人曰。相公惡名耳。奸佞庸鄙。誤國之賊。予深恨之。毋予瀆也。混沌未鑿。雖不辨名實。嚴氣正性。凜然莫犯。如此行年十歲。歲在丙戌。明運將革。廣州唐王。粵西桂王。各臣其臣。士其士。擁戴角立。城池累卵。如燕處堂。弗卹也。先君謂吾師曰。天下大亂。民不聊生。兒輩讀書。且休保全性命足矣。予從旁應聲云。除卻詩書。將以何者爲性命乎。先君笑爲癡兒。朝夕就傳。學業不輟。是歲十月之朔。清撫軍修名養甲。督師李名成棟。潛師東下。直抵省城。城門不閉。兵不血刃。入郭如破竹。唐王肇武。身殉社稷。予隨父母避兵。亦院。竄榛莽間。三日不火。夜半還家。得少食而返。祖母二親未食。已不敢先。雖極饑困。強作飽聲。遇齋戒期。望空頂禮。素食如常。時年十有一歲。在丁亥。兵馬蹂躪。家陷城中。四月內。有柱穀短衿之禍。無享受戮者數千人。蓋李帥誤聽訛言。謂城中百姓。結盟爲亂。各翦其衣內衿。令短爲號。不知廣民製衣。多省布帛。而縮其衿。李帥信之。執途人驗其衿短。卽棄市。先君亦短其衿。在途聞變。不知所以。踰垣避之。幸免於難。厥後李帥督師。敗於信豐。亂流以濟。水及馬腹耳。忽有鬼物。出立水面。

牽掣其衿，纏繫頸項，遂溺而死。左右皆見，弗能救也。論者咸謂短衿之報云。從此閉門，非有大故，不敢出入。予伏處牖下，忍聲默誦，日夕不輟。年十有二歲，在戊子，大兵之後，必有凶年，至夏大饑，斗米千錢，人或相食。予家十餘口，日啖糠粇，存亡不保。至是始廢學業，齋戒禮拜，未嘗廢也。艱難萬狀，不可具述。先是修李爭長，文武不協，李帥蠟書密通西粵，迎立桂王，移師下端州。三月內，反正朔，復衣冠，奉桂王爲主，改元永歷。以郡字爲行宮。時方危亂，文臣縮手，詞翰需人。先君蒙薦，詔授翰林庶常。予從赴行在，知其不可力勸返轍。先君亦以爲然，以母老辭退，脩初服。既歸里，佃田數畝於東郊外黃花塘畔，率兒僕躬耕，築草亭於田間，以避風雨。顏曰祝豐。予雖總角，膺力過人，負耜饁餉。一日數往返，猶能乘閒讀書。先君加顧復焉。舊集中有祝豐亭示兒詩，蓋命之也。詩失於兵，僅憶笑看耜者，猶是採薪人之句，餘忘之矣。年十有三歲，在己丑，反覆粗定，有司試士，予出應童子科，見賞於番禺邑令汪公，名起較，號漢卿。三覆面試，名列第五，以文體出格而抑之也。應學道試，文宗李公名綺，字友三，閱二藝，亦以奇橫惜之。列名案末，充番禺博士弟子員。時年僅舞象耳，卓然章縫之列，覆髻髮以儒冠，釋斑衣而儒服，歸於鄉里，人爭榮之。笑語之曰：此兒戲耳。予何樂此？名教中大有樂地。請索我於塵飯塗羹之外，見真秀才真面目矣。聞者皆謂狡童口給舍而去之。年十有四歲，在庚寅，清平南王尙名可喜，靖南王耿名重明，帥師南下，恢復廣東。正月內，城中聞警，舉國惶惶，巡撫杜名永和移家戰艦，將帆海南竄矣。越月，大兵未入境，復還據城，未幾，兵至，駐札北郭外，連營十里，軍勢殊銳。杜不克，帆海乃堅壁固守，三面拒敵，惟南門通海，遂接濟糧草，不致合圍坐

困耳。下令居民婦女不許出城。男子往來印臂爲號。先君以母在不忍遽去。遣予兄弟先還鄉里。圍城八月餘。日夕攻守。砲礮聲如海雷。民不聊生。士不解甲。城中有掌兵柄者范某。踰垣納款。致礮臺失守。清兵據險薄城。勢不可支。衆將解體。先君知不可守。泣別老母。先六日冒險還鄉。至十月初二日城陷。以拒命故屠焉。男子之在城者。靡有孑遺。婦稚悉爲俘擄。監管取贖。七日止殺。先君入城。幸眷屬無恙。揭榜闕門。責輸軍餉二千餘金。先君還里。罄賣田宅典鬻衣物。經營二月餘。眷屬復得完聚。既歸。家徒四壁。生計蕭然。不得已設席黨塾。受徒傳經。藉補肺以供菽水。令予兄弟改業。學爲農圃。佃田耕稼。借地樹藝。饑寒切身。不復知有詩書矣。昔持齋戒。不覺漸負夙心。初焉不擇葷素。饑則餉之。久之不顧名分。急則就之。童時嬉戲。夙習尙存。往往見獵心動。日與鄉里惡少交遊。舉重扛鼎。運槩試劍。橫行市井。莫敢誰何。幸而廉恥尙存。殺盜淫妄。未嘗破犯耳。出遇不平。奮臂而起。鋤強扶弱。不避權貴。敬賢疾惡。不擇親疎。慨然以任俠自許。郭解荆卿。無多讓也。倒行逆施。不可盡述。年十有五。歲在辛卯。嶺南底定。文宗李名頤。馳檄遠近。歲例校士。士子一名不到。以叛逆罪罪之。永謝場屋。先君既有命矣。至是公令嚴督。自憑血氣之勇。文以忠孝之名。毅然不赴。衆皆危之。或相勸曰。盍畏死乎。曰。人誰不死。貴得死所。壯士死於沙場。義士死於法場。文士死於名場。等死耳。既不能爲馬革裹屍。復不屑爲猴冠改面。捨生取義。不獨勝於文場。求活耶。未幾。場後計不赴考數十百人。不可勝誅。文宗雅量。置之不問。榜列姓名。除諸生籍。且令學校諸生作西山採薇文以送之。予獲幸免。殊有矜色。誇示同黨。自稱忠孝男子。不自知其非也。父母禁之不可。宗族鄉黨憂

之不敢面斥其非。年十有六歲在壬辰。聖駕如故。忤逆不可枚舉。年十有七歲在癸巳。歲復大禋。數年來兇悍之性。爲饑渴所迫。漸次消磨。平日交遊惡少。半爲溝壑殍。至是始萌悔心。一日侍立講席。先君演說論語。至德之不修章。援引晉人周處晚節。勸勵改過。處字子隱。膂力絕倫。不修細行。州里患之。自知爲人所惡。出謂其父老曰。方今歲穰年豐。盍行樂乎。父老曰。三害未除。何樂之有。處問三害所指。曰。南山虎。長橋蛟。并子爲三耳。處慨然請曰。三害吾能除之。乃登山射虎。入水殺蛟。歸而勵志好學。心存義烈。言必忠信。卒爲善士。成令名。援古至此。呼子乳名曰因官。汝類周處。能爲處乎。予泣而悔曰。處何人也。予何人也。敢不受命。貽憂父母乎。遽返己室。大索平日所弄兵杖。投諸水火。狎暱惡少。誓與絕交。立取家藏書籍。移置座側。日與古人爲友。筆墨之外。不復知有戈矛矣。攻苦逾年。經學淹貫。子史百家言。未卒業也。至年十八歲在甲午。館於家廟之寢室。羅致羣書。杜門謝客。晝夜稽古。撤去牀席。不臥不坐。倦則倚壁披卷。入夜擁書就月。自春迄秋。忽然有悟。得博學反約之要。出關與同學談說文義。衡論古今。懸河倒峽。莫能窮其辨者。一日請於先君。求爲人師。硯耕以養。先君疑之。試以講義。出入經史。老生弗若之也。時有世友郭子名鵬。字程萬。在座。喜而商之曰。館席在我。第恐年少。識力未定。夙習復萌。攘臂下車。爲士論所笑耳。先君請姑試之。郭乃適東郭十里外棠下鄉。過其舊館。居停主人鍾公樸菴。訥菴博學而好賢者。語其事。請設醴焉。長者欣然許之。時年十九歲在乙未。齋幣來聘。延致師席。受諸生禮。鍾氏子弟皆髯丈夫也。予猶未冠。微有難色。辭弗獲已。公然受之。既正席。說書監義。據古證今。鑿鑿有本。諸生側耳改容。會日課文。程藝

先出離奇光怪。自成一家之言。鄰館宿儒。皆以年少忽之。東家知人。禮敬弗衰。居無何。鄉有大會。角力賭勝。祠內巨鐘。重數百斤。懸絕而仆於地。衆共舉之。弗勝。譁聲達於館席。予出而觀之。見獵心動。果如郭子之言。攘臂而起。擎巨鐘若挈瓶然。衆皆驚以爲神。自是日與市人狎習。平生所特以見長者。不覺畢露。學業漸荒矣。而師資軌範。終始肅然。二時講肄。未嘗愆期。可告無過於鍾氏。獨有慚於郭子耳。年二十歲在丙申。自知弱冠不可以爲師也。反其舊業。復治農圃。以養父母。饑飽勞役。寒暑不時。得瘡疾。於夏畦。猶荷鋤力作也。病中自笑曰。焉有拔山蓋世之雄。甘爲賣菜傭。死牖下乎。釋鋤而起。復出求館席於所親。得蒙童數輩。誓改前轍。屈志以事行墨。年二十有一歲。在丁酉。館於順德碧江梁氏。桑梓接壤。相距一水耳。往來省覲。未嘗以跋涉爲勞。東家賢。爲築別館。以居講席。其子弟復馴謹。無執袴氣。予知其可教也。悉心遇之。朝夕講究。夜以繼日。不半載。粗知大意。予立教過嚴。出入威儀。聲音點畫。少有差謬。撲責不爲寬假。蒙童恬然受責。父母之愛其子者。不敢旁致一詞。自春迄秋。兩年宿瘡。寒熱日甚。至八月十日晨起。受食。食中有小筍魚二。熟陳俎上。予病禁所宜也。舉箸頃。熟視二魚。忽鱗甲聳動。輿之微有腥氣。腹大作悶。盡吐宿食而出。胸次灑然。向來滯膈之物。如冷水盪去。洞然具見。真實悟緣。從此始也。夙瘡亦已頓除。此雖小節。志之。不忘入悟之初機爾。是夏有室。越八年。露兒生。又四年。照兒生。摩耶羅腹。夙緣大覺不免。何況凡夫。不足道也。予自丁酉八月後。便覺身心安穩。動靜一如。視前境界。劃然判作兩人。雖多生習氣。淘汰未淨。石火電光。忽起忽滅。主人公面目。未嘗動著絲毫。從是歲至壬寅。皆設帳於碧江梁氏。自念家有老父。

矢志不仕。硯耕養母。餬其口於觚翰。爲之子者。不忍坐食。不得已俯首人後。甘爲學究生涯。平生倜儻任俠之概。銷磨殆盡。入與乳臭嬰兒。填硃連墨。出與黃髮老儒。依文論義。農圃野人。品晴較雨。負戴備販。把臂周旋。此外別無高情卓識之輩。聞所未聞。見所未見。鬱鬱兩經寒暑。馬齒加長。坐井觀天。學問不增。見聞不廣。中心歉然。越三年庚子。越陌度阡。旁求聲氣。聞鄰境蘇氏。有高尙老人。晦迹稠中人罕知者。一爲岸菴居士。一爲碧溪臥叟。岸菴中年因病廢耳。奇聾不與聲接。初往見之。值門堅閉。不容剝啄。大聲傳呼。弗之應也。悵然而返。翊日復往。門閉如昨。三至三返。猶作門外漢。訊諸其鄰。乃知此公誠聾。不可以聲致者。必踰垣始得見耳。依其言以入。主人默坐。視客而笑。指席上硯旁筆墨具焉。起語客曰。余聾漢也。子何人。至何自來。何求。濡毫寫硯。吾知所以報子矣。子乃大書云。久客茲土。鮮見寡聞。衷有疑情。思就正爾。笑點其首曰。可。子且去。吾方止靜。不暇此也。當俟明日。日過亭午。可快談至夕矣。子辭而退。復踰垣出。自是如約。午至申返。中有所疑。水墨書硯。或指畫案上。隨叩而應。不少爲隱。笑謂予曰。古有五官並用者。予以目代耳。子以手代口。天下豈有聾人啞漢乎哉。日與之處。悟圓通門。不由聲入。平生所學。盡成糠粕矣。碧溪臥叟者。年七十餘。老而無子。僅一孤孫。蠢然失學。止供樵爨。兢兢獨居。日夕閉門著書。其書甚秘。出入絨膝什襲。或求一覽者。千金弗與也。子聞其事。知爲異人。思一窺其藏。晨往就之。遇其朝炊。孤孫索米於市。子拜牀下。執禮惟謹。叟傲然不顧。叱曰。汝從何來。速爲老夫具膳。子起就爨。踞爲煨薪。煨湯請類。類已點茶。揖而進之。將炊。孤孫負米歸矣。子齒其孫父子也。敬其祖。以弟禮之。爲之代勞。饕殮所缺。竭力圖之。

俾無匱乏。不言所以。叟知微意。徐問之曰。子之來。得無有所欲於老夫乎。老夫家徒四壁。室如懸磬。負子矣。子拜而請曰。實無它求。欲見老人篋中祕耳。沈吟良久。揮之使退。曰。異日當來。期子於夕。如約至。則松燈熒熒。擁書獨坐。孤孫不復侍側矣。呼子使拜。拜已。使起近席。出其書數十餘卷。皆平生著述。編次井然。燈下授受。居然以黃石公自待。子亦自甘爲孺子。略爲啓視。文奧義深。倉卒不可卒業。拜手受之。夜歸館席。篝燈披覽。達旦。蓋天文地理。陰符兵法。三式六壬。奇門演禽之學。言少時曾得是書於異人。潛心久矣。未窺其奧。今所授者。方諸前書。互相徑庭。茫然不知所擇。踟躕數日。齋宿載幣以往。丐其面命。叟笑而言曰。子念子之誠。慙子之癡。姑相報耳。子果位中人。非術數之學。可畫地而趨也。凡有文字。可觀理數。可測者。均非上乘妙悟。子歸矣。當向上求之。今人粗心大膽。任智使氣。自謂英雄。一將功成。萬骨枯。皆若輩也。草木同朽腐耳。須求爲真英雄。真男子。方堪作真聖賢。真仙真佛也。子聞命慙然而退。歸館數日。終不能忘情於所好。前書嘗繫肘後。寢食不離。竟無所得。向來知解。猶如夢中獲寶。究不得其真實受用處。疑情未破也。年二十有七。歲在癸卯。辭梁氏歸鄉里。設帳於家廟之寢室。從之遊者。皆族中執衿子弟。子教督嚴憚。踰於梁氏之子。以其狃於富貴之習。琴瑟不調甚矣。非更張不能鼓也。未期月。子弟出入。皆知揖讓。粗通文義。學爲制科業。稍能破除世俗塵腐之習。次年甲辰。年二十有八矣。家從兄蒙章。成進士。先伯正菴公。慮其子弟之驕惰也。延至家塾。子既居西席已。揖伯言曰。今而後師矣。幸毋以家人視我。乃兀坐終日。授經講義。如嚴師保。子弟不率。鞭撻從之。不少寬假。伯父母聞撻責聲。心生不忍。叩門請貸。閉戶不納。

曰。予先有請矣。欲寬假耶。請俟明年。自是家人雖甚姑息。不敢旁致一辭。居二年。子弟出入。恂恂乎鄒魯也。歲在丙午。碧江梁氏復延居師席。昔年髫髻。皆成人矣。追思前教。冀有異聞。予時方以道學自任。復館二年。所講求者。皆濂洛關閩之學。無復經生訓詁之常談。蓋年與學增。識隨齒長也。自甲辰以後。專心理學。非聖人之言不言。非聖人之行不行。日與二三良友。伯兄仲弟輩。朝夕砥礪。期爲晚世之真儒。維持風化。帖括之言。口耳之學。不屑道也。年三十有三。歲在己酉。館於佛山。建武陳金吾之家。鄰人馮氏各有子孫。思得嚴師督責。聞予名。賁贐以請。予應聘至。端居師席。不苟言笑。立言設教。首以儒行爲務。及門士。初畏憚之久。之起敬生信。受業二年。翕然思爲聖賢之士矣。年三十有五。辛亥正月。先君以骨氣內攻。臥病經旬。遽捐賓客之館。予辭館執喪。讀禮於家。兄弟居廬。力循典禮。三日不食。百日飭粥。期年蔬食。三年蔬果不入內室。不茹葷酒肉食。附身附棺。必誠必敬焉。良由平生所學。得諸聖賢者。篤信力行。非爲生者也。期月改練。歲在壬子。家有大母。耄且耄矣。老母善病。無以爲養。權復舊館。往應佛山之請。棘人藥藥。柴形骨立。僅存視息。無復生意。年三十有七。歲在癸丑。先君已歸窆。窆。風木與悲。思有所以報罔極者。夙夜永懷。學業幾廢。一日散帙。得向所受於碧溪臥叟者。三復研究。始悟不傳之祕。數年來所講道學。談性理者。復爲夙習所勝。是時海內多故思。出其技一試之。偶從東家席上。遇一異人。來自燕京。衆皆稱爲張仙者。多默少語。是夜同宿室中。對榻滅燭就寢。異人兀坐面壁。不交一言。坐至子半。楊中耿耿有光。未幾。光洞屋極。急起視之。異人徧體毫髮。放光四射。予固知其非常。坐以待旦。雞初鳴。光復攝入如平時。晨起就榻。

拜請其術。異人笑而不答。頃乃云。幸汝弗予驚也。驚則予與汝皆死矣。予聞而悚然。還就篋中。出前所受書。拜首請益。冀有誨所不逮也。三請而三卻焉。一如前叟之言。退而自負。持此書以應世。可王可霸矣。次年甲寅。當宁有徙置三藩之議。予移席佛山李氏之館。仰觀天象。出語人曰。天下從此多事。將有變亂。不久底定。無足憂也。未幾。滇黔拒命。閩粵繼之。大江以南。阻於聲教。四方不軌之徒。相繼蠭起。嶺南山海。半爲嘯聚之場。先是黨中之任俠者。詘於時勢。弗獲一逞。至是奮臂而起。人盡資育。咸以豪傑自命。予固知其不濟也。力勸止之。曰。歷數有歸。神器未易窺也。衆皆哂爲懦怯。拱手謝之。閉戶不出。後聞外人沸議。有覬覦前書者。急投水火。然平生夙習。聞鼙鼓聲。時復躍躍也。年三十有九。歲在乙卯。先祖母邱太孺人棄世。予以家孫承重。居廬守制。一如前喪。苦塊之下。雖挾我以風雲。動我以帶礪。弗遑顧矣。歲在丙辰。予年四十。春三月。嶺南反復衣冠。予從綬絰中。見作隨喜。自幸本來面目。得全生全歸。見先人於地下也。丁巳。禪祭畢。演黔之炎。炎者。將見撲滅。閩廣之滔。滔者。漸覩安瀾。冠冕之義。義者。又不免於裂冠毀冕。退脩初服矣。是時丁巳歲五月五日也。余年四十有一矣。聞變而起。仰天大笑曰。久矣夫。吾之見累於髮膚也。左手握髮。右持并剪。大聲疾呼曰。黃面老子。而今而後。還我本來面目。見先人於西方極樂之世矣。同時相約披髮入山者。故人陶握山也。握山前身。爲白雲山濂泉行僧。乘願再來。予與生同庚。居同城。長同學。同負不羈之志。思與造物者爭復覆之權。爭之竟不能勝。將還之造物。尋濂泉之舊隱矣。與予盟。卜日雉髮。奈彼壯志未銷。風力所轉。寒盟而去。終其身爲俗人。惜哉。予則絕塵先奔也。快哉。予時未有師也。寄迹

於南海弼唐之亦菴居數日。有客僧一拍得大至。大言不慚。訝予出家之奇。問曰。子名誰。即答曰。名誰。師何人。答曰。師心受何戒。曰。四勿受於吾師。三戒受於心師。此吾戒鬪時也。客曰。無師無名。且無戒體。奚以異於俗人。即諷之云。即今有師有名。稟受具戒。能保其不爲俗人耶。二僧別去。未幾。罷道爲賈販窮丐而死。彼所謂者。竟成出世丈夫矣。人之不可量也。如是夫。次年戊午。予年四十有二矣。時粵東變亂。盜賊蠭起。雖欲遠適。蹙蹙靡所騁也。暫假館於故人陶握山之別業。依山而居。山名小漫者。因漫溪而得名。同時避亂擇里買鄰。惟弼唐爲安土。蓋先儒之後。俗厚人淳。有理學之遺風焉。明經祖如高士法啓。弼唐公後昆也。避地者咸奉之爲居。亭梁藥亭太史爲首倡。予亦與焉。買地十餘畝。環溪卜築。師以簞簞森然。有山水之趣。藥亭顧而樂之。謂同事者曰。此漫隱之所。我輩豈蓬蒿人耶。遂名其地爲漫溪。自號漫溪翁焉。握山家有餘貲。別買地於山之陽。去漫溪烟火相望耳。結屋數椽。以待避亂之客。名小漫山。溪山均漫隱者之所居。聲應氣求。出處一轍也。是時小漫主人全髮入山。委其居於草莽。予曰。暮途窮。計無復之。乃寄迹焉。亦漫然安之而已。居半載。大病幾死。好友李祈年憐予貧病。移榻就之。投以藥石。越月乃瘳。年四十有三歲。在己未。病少瘳。先師石洞和尚。因入雲門掃偃祖塔。道經小漫山。過余。余述前願。乞爲弟子。乃受法名。名曰光鷲。字曰迹刪。受持齋素自此始也。時亂初定。生計窮蹙。無所往矣。適故人李方水之弟蒼水官於循州之長樂。官舍岑寂。思得知己晤對。商略古今。書來見招。方水贈以屏屨。遂孑然孤往。時方九月。主人獨坐空齋。殊爲悲秋之感。而予適至。快稱良覿。解裝後。相與墾地栽花。移梅種石爲樂。忘此身之在客。